



Šemsudin Mehmedović

Broj: 01-*177*/24

Sarajevo: 23.2.2024.godine

PREDSTAVNIČKI DOM
PARLAMENTARNE SKUPŠTINE
BOSNE I HERCEGOVINE

n/r predsjedavajućeg



PRIMLJENO: 23-02-2024			
Organizaciona jedinica	Klasifikaciona oznaka	Redni broj	Broj priloga
01-	50-1-	443/24	

U skladu s čl. 170. i 171. stav (4) Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22) postavljam sljedeće

**ZASTUPNIČKO PITANJE ZA
KOLEGIJ SEKRETARIJATA
PARLAMENTARNE SKUPŠTINE BOSNE I HERCEGOVINE**

Na osnovu kojeg propisa je Kolegij Sekretarijata Parlamentarne skupštine Bosne i Hercegovine dozvolio da 39 službenika i zaposlenika Parlamentarne skupštine Bosne i Hercegovine, koji imaju prebivalište u Republici Srpskoj, u listu prisustva na poslu upišu 9. januar 2024. godine kao državni praznik i da im, na osnovu toga, taj dan kada nisu bili na poslu, bude plaćen kao državni praznik?

Da li su članovi Kolegija Sekretarijata Parlamentarne skupštine Bosne i Hercegovine, kao pravnici sa dugogodišnjim iskustvom, upoznati s presudom Ustavnog suda Bosne i Hercegovine u predmetu U 2/18, objavljenom u Službenom glasniku BiH, broj 30/19, a kojom je utvrđeno da 9. januar kao “Dan Republike Srpske” nije u skladu sa Ustavom Bosne i Hercegovine i kojom je ukinut član 2. stav 1. Zakona o Danu Republike Srpske koji je to propisivao?

Obrazloženje

Ustavni sud Bosne i Hercegovine je, u predmetu broj U 2/18, na sjednici držanoj 28. marta 2019. godine donio *Odluku o dopustivosti i meritumu* kojom je usvojio zahtjev devet delegata Vijeća naroda Republike Srpske za ocjenu ustavnosti člana 2. stav 1. Zakona o Danu Republike Srpske (“Službeni glasnik RS” broj 113/16).

Ustavni sud Bosne i Hercegovine je utvrdio da **član 2. stav (1) Zakona o Danu Republike Srpske** (“Službeni glasnik Republike Srpske” broj 113/16) koji glasi: “Na osnovu potvrđene volje građana Republike Srpske, **9. januar se utvrđuje kao Dan Republike**” **nije u skladu sa članom I/2. Ustava Bosne i Hercegovine**, članom II/4. Ustava Bosne i Hercegovine u vezi sa članom 1.1. i članom 2.a) i c) Međunarodne konvencije o ukidanju svih oblika rasne diskriminacije i članom 1. Protokola broj 12 uz Evropsku konvenciju za zaštitu ljudskih prava i osnovnih sloboda i članom VI/5. Ustava Bosne i Hercegovine.

Istom Odlukom je Ustavni sud Bosne i Hercegovine, a u skladu sa članom 61. stav (2) Pravila Ustavnog suda Bosne i Hercegovine, **ukinuo sporni član 2. stav (1) Zakona o Danu Republike Srpske i odlučio da prestaje** da važi narednog dana od dana objavljivanja ove odluke u "Službenom glasniku Bosne i Hercegovine", u skladu sa članom 61. stav (3) Pravila Ustavnog suda Bosne i Hercegovine.

Odluka Ustavnog suda Bosne i Hercegovine, u predmetu U 2/18, **objavljena je u Službenom glasniku BiH, broj 30/19.**

I pored toga, Sekretarijat Parlamentarne skupštine Bosne i Hercegovine, u odgovoru jednom bosanskohercegovačkom mediju od 14.2.2024. godine, obavještava da **"39 uposlenika nije radilo sa adresom u entitetu Republika Srpska na dan 9.1.2024. godine."**

Sekretarijat obavještava isti medij da je **"9.1.2024. evidentiran kao neradni dan za zaposlene u Parlamentarnoj skupštini Bosne i Hercegovine, a koji imaju mjesto prebivališta na teritoriji Republike Srpske. U skladu s tim, zaposlenim sa prebivalištem iz Republike Srpske 9.1.2024., je evidentiran u ših listi kao državni praznik."**

Nadalje, Sekretarijat se poziva na član 5. stav (2) Odluke o načinu i postupku ostvarivanja prava na naknadu za prekovremeni rad, rad u neradne dane, noćni rad i rad u dane državnih praznika u institucijama Bosne i Hercegovine ("Službeni glasnik BiH" broj 7/09) kojim je propisano će, do donošenja zakona od strane Parlamentarne skupštine Bosne i Hercegovine, **državnim praznikom**, u smislu utvrđivanja prava na naknadu, **"smatrat će se praznici utvrđeni entitetskim zakonima prema mjestu prebivališta zaposlenog, te je isto bilo osnov za naprijed navedeno postupanje Parlamentarne skupštine Bosne i Hercegovine"**.

Očito, za utvrđivanje osnova za navedeno postupanje, Sekretarijat Parlamentarne skupštine Bosne i Hercegovine nije uzeo u obzir niti poštovao Odluku Ustavnog suda Bosne i Hercegovine u predmetu U 2/18, objavljenu u Službenom glasniku BiH, broj 30/19, koja se direktno odnosi na utvrđivanje prava na naknadu državnih službenika i zaposlenika Parlamentarne skupštine Bosne i Hercegovine po osnovu državnog praznika.

S poštovanjem,

ZASTUPNIK PS BiH
Šemsudin Mehmedović

